

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савјет*

**R J E Š E N J E**

**po Prijavi namjere koncentracije između privrednih subjekata GeoPost S.A.  
Paris, Francuska i “DPD” d.o.o. za međunarodnu špediciju Sarajevo, BiH**

**Sarajevo  
Juli, 2008. godine**



**Broj:01-02-26-017-7-II/08**  
**Sarajevo, 24.07.2008. godine**

Na osnovu člana 25. stav (1) pod e) člana 42. stav (1) tačka d) u vezi sa čl. 12., 14., 16. i 18. Zakona o konkurenciji («Službeni glasnik BiH», br. 48/05 i 76/07), po Prijavi namjere koncentracije između privrednog subjekta GeoPost S.A. 2 ter rue Louis Armand, 75015 Paris, Francuska, zastupanog po advokatu Seadu Miljkoviću, Fra Anđela Zvizdovića 1, 71000 Sarajevo, Bosna i Hercegovina, i privrednog subjekta «DPD» d.o.o. za međunarodnu špediciju Sarajevo, Halilović b.b., Sarajevo, Bosna i Hercegovina, zaprimljenu pod brojem: 01-02-26-017-II/08 dana 14.05.2008. godine, Konkurencijsko vijeće, na 70. (sedamdesetoj) sjednici održanoj dana 24.07.2008. godine, je donijelo sljedeće

### **R J E Š E N J E**

1. Ocjenjuje se dopuštenom koncentracija koja će nastati na tržištu pružanja kurirskih usluga, osim javnih poštanskih, na tržištu Bosne i Hercegovine sticanjem kontrole kupovinom većinskog vlasničkog udjela od strane privrednog subjekta GeoPost S.A. 2 ter rue Louis Armand, 75015 Paris, Francuska u privrednom subjektu «DPD» d.o.o. za međunarodnu špediciju Sarajevo, Halilović b.b., Sarajevo, Bosna i Hercegovina.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je, dana 14.05.2008. godine, zaprimilo Prijavu namjere koncentracije broj: 01-02-26-017-II/08 (u daljem tekstu: Prijava) privrednog subjekta GeoPost S.A. 2 ter rue Louis Armand, 75015 Paris, Francuska (u daljem tekstu: GeoPost S.A. ili Podnosilac prijave) zastupan po advokatu Seadu Miljkoviću, Fra Anđela Zvizdovića 1, 71000 Sarajevo, Bosna i Hercegovina, po kojoj namjerava kupiti većinski udio od 70% privrednog subjekta «DPD» d.o.o. za međunarodnu špediciju Sarajevo, Halilović b.b., Sarajevo, Bosna i Hercegovina (u daljem tekstu: DPD).

Prijava je samoinicijativno, od strane Podnosioca prijave, dopunjena dopisom broj: 01-02-26-017-1-II/08 dana 22.05.2007. godine.

Uvidom u podnesenu Prijavu utvđeno je da ista nije uredna i kompletna, u smislu člana 30 stav (1) Zakona o konkurenciji (u daljem tekstu: Zakon) i čl. 8. 9. 10. Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 95/06) te je Konkurencijsko vijeće, u skladu sa članom 31. istog Zakona, zatražilo dopunu dana 02.06.2008. godine dopisom broj: 01-02-26-017-2-II/08.

Podnosilac prijave je, u skladu sa zahtjevima Konkurencijskog vijeća, dopunio Prijavu nedostajućom dokumentacijom dana 03.06.2008. godine dopisom broj: 01-02-26-017-3-II/08.

Nakon toga, Konkurencijsko vijeće je dana 24.06.2008. godine dopisom broj: 01-02-26-017-4-II/08 Podnosiocu prijave izdalo Potvrdu o prijemu uredne i kompletne Prijave, u smislu člana 30. stav (3) Zakona.

U skladu sa članom 30. stav (2) Zakona Podnosilac Prijave navodi da namjerava podnijeti zahtjev za ocjenu koncentracije ovlaštenom tijelu za ocjenu koncentracije u Republici Srbiji.

Konkurencijsko vijeće, u postupku ocjene dopuštenosti predmetne koncentracije, je utvrdilo sljedeće činjenice:

Konkurencijsko vijeće je utvrdilo da je Prijava podnesena u Zakonom propisanom roku, u smislu člana 16. stav (1) Zakona.

## **1. Učesnici predmetne koncentracije**

Učesnici predmetne koncentracije su privredni subjekt GeoPost S.A, 2 ter rue Louis Armand, 75015 Paris, Francuska i privredni subjekt "DPD" d.o.o.za međunarodnu špediciju Sarajevo, Halilovići b.b., Sarajevo, Bosna i Hercegovina.

### **1.1. Privredni subjekt GeoPost**

Učesnik koncentracije dioničko društvo GeoPost S.A, 2 ter rue Louis Armand, 75015 Paris, Francuska registrovano je u Trgovačkom sudu u Parizu pod registarskim brojem B340 012 392 RCS Paris.

Privredni subjekt GeoPost S.A. je član grupe GeoPost (u daljem tekstu: «Grupa GeoPost») jednog od vodećih učesnika na svjetskom tržištu isporuke pošiljki i brze isporuke.

Grupa GeoPost je aktivna u preko 30 zemalja. Predstavlja trećeg po redu pružaoca usluga brze i odgođene isporuke pošiljki u Evropi prema ostvarenom prometu, a drugog po redu u Evropi prema obimu pošiljki.

Grupa GeoPost je 100% u vlasništvu grupe La Poste Exploitant Public (u daljem tekstu: „La Poste“), francuskog nacionalnog pružaoca poštanskih usluga, a organizovana je u četiri poslovna sektora i to: poštanske usluge, isporuka i brza isporuka pošiljki, maloprodaja i tzv. poštanska banka.

### **Supsidijarna društva privrednog subjekta GeoPost na tržištu Bosne i Hercegovine**

Privredni subjekt La Poste odnosno Grupa GeoPost je putem privrednog subjekta GeoPost International Management & Development Holding GmbH, Wailandtstrasse 1, 63741 Aschaffenburg, Savezna Republika Njemačka, upisan u Trgovački registar Osnovnog suda u Aschaffenburg-u pod brojem HRB 8345 prisutan je na tržištu Bosne i Hercegovine kroz posjedovanje 30% vlasničkog udjela u privrednom subjektu učesniku koncentracije DPD.

Niti jedan drugi privredni subjekt koji pripada grupi GeoPost/La Poste nije aktivan na tržištu Bosne i Hercegovine.

### **1.2. Privredni subjekt "DPD" d.o.o. za međunarodnu špediciju Sarajevo**

Učesnik koncentracije privredni subjekt "DPD" d.o.o.za međunarodnu špediciju Sarajevo, Halilovići b.b., Sarajevo, Bosna i Hercegovina registrovan je kod Općinskog suda u Sarajevu pod registracijskim brojem 1-24728. Vlasničku strukturu privrednog subjekta DPD čini privredni subjekt GeoPost International Management & Development Holding GmbH, koji predstavlja dio grupe GeoPost, sa 30% udjela i privredni subjekt Lagermax Paketlogistik International GmbH, Radingerstrasse 16, A-5020 Salzburg, (u daljem tekstu: Lagermax) sa 70% udjela u privrednom subjektu DPD.

Privredni subjekt Lagermax registrovan je u Privrednom registru u Salzburgu pod registracijskim brojem FN 243727. Pored udjela u privrednom subjektu DPD, privredni subjekt Lagermax ima još

jedno supsidijarno društvo u BiH i to privredni subjekt Lagermax AED Bosna i Hercegovina d.o.o. Sarajevo, koje pretežno pruža špeditorske usluge, usluge skladištenja kao i usluge domaćeg i međunarodnog transporta i logistike.

Osnovna registrovana djelatnost privrednog subjekta DPD je pružanje kurirskih usluga (osim javnih poštanskih) i brza isporuka pošiljki, odnosno paketa težine do 31,5 kg, te dimenzija koje ne prelaze širinu od 1,7 m i dužinu od 3 m.

Učesnik koncentracije DPD nema vlasničke udjele u drugim privrednim subjektima na tržištu Bosne i Hercegovine.

## 2. Obaveza prijave namjere koncentracije

Na osnovu ostvarenog godišnjeg prihoda učesnika koncentracije na dan 31.12.2007. godine proizašla je obaveza prijave namjere koncentracije, u smislu člana 14. stav (1) tačka a) Zakona.

Ukupni prihodi učesnika koncentracije i ostalih na dan 31.12.2007. godine prikazani su u Tabeli 1:

**Tabela 1.**

<b>Ukupni prihod (KM)</b>	<b>La Poste</b>	<b>GeoPost</b>	<b>DPD</b>	<b>Lagermax</b>
<b>Svijet</b>	(..)** <sup>1</sup>	(..)**	-	(..)**
<b>Bosna i Hercegovina</b>	-	-	(..)**	(..)**

Ukupni prihod učesnika koncentracije ostvaren prodajom roba na svjetskom tržištu iznosi preko 100.000.000,00 KM po završnom računu u godini koja je prethodila koncentraciji, odnosno privredni subjekat GeoPost je ostvario prihod (..)\*\* KM na dan 31.12.2007. godine i obzirom da su učesnici koncentracije registrovani na teritoriji Bosne i Hercegovine Podnosilac prijave, na osnovu člana 14. stav (1) Zakona, je obavezan podnijeti Prijavu.

## 3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterijima za ocjenu koncentracija privrednih subjekata.

## 4. Pravni osnov i oblik koncentracije

Kao pravni osnov predmetne koncentracije Podnosilac prijave je dostavio Ugovor o kupoprodaji udjela zaključen dana 6. maja 2008. godine između privrednih subjekata GeoPost S.A. i Lagermax na osnovu kojeg privredni subjekt GeoPost S.A. namjerava od privrednog subjekta Lagermax steći udio od 70% u privrednom subjektu DPD.

Na osnovu predmetnog Ugovora GeoPost S.A. također namjerava steći (..)\*\*% udjela u privrednom subjektu DPD Direktna paketna distribucija croatia d.o.o., Franje Lučića 23, Zagreb, Hrvatska registrovan kod Trgovačkog Suda u Zagrebu, pod registracijskim brojem 080473892, (..)\*\*% udjela u privrednom subjektu DPD Direktna paketna dostava d.o.o., Golubinačka b.b. Šimanovci, Srbija

<sup>1</sup> (..)\*\* - Podaci predstavljaju poslovnu tajnu

registrovan u registru privrednih subjekata kod Agencije za Poslovne Registre, pod registracijskim brojem 17591258 i (...)\*\*\*% udjela u privrednom subjektu DPD Kurirska in paketna distribucija d.o.o., Celovška cesta 492, 1210 Ljubljana, Slovenija registrovan u registru privrednih subjekata kod Okružnog suda u Ljubljani, pod registracijskim brojem 13996100.

Za navedene udjele privredni subjekt GeoPost S.A. će privrednom subjektu Lagermax isplatiti ukupnu cijenu u iznosu od oko (...)\*\* KM ((..)\*\*EUR).

Privredni subjekti DPD Direktna paketna distribucija croatia d.o.o., Franje Lučića 23, Zagreb, Hrvatska, DPD Direktna paketna dostava d.o.o., Golubinačka b.b. Šimanovci, Srbija i DPD Kurirska in paketna distribucija d.o.o., Celovška cesta 492, 1210 Ljubljana, Slovenija nemaju registrovanih supsidijarnih društava u Bosni i Hercegovini niti su vlasnici udjela u bilo kojem privrednom subjektu koje je aktivno na bh tržištu.

Pravni oblik predmetne koncentracije sticanje kontrole od strane privrednog subjekta GeoPost S.A. nad privrednim subjektom DPD, u skladu sa članom 12. stav (1) tačka (b) pod 1) Zakona.

## **5. Relevantno tržište**

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjivi s obzirom na njihove bitne karakteristike, kvalitet, namjenu, cijenu ili način upotrebe.

Nadalje, prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Prilikom analize relevantnog tržišta učesnika predmetne koncentracije Konkurencijsko vijeće je utvrdilo da je relevantno tržište predmetne koncentracije tržište pružanja kurirskih usluga, osim javnih poštanskih.

Relevantnim geografskim tržištem smatra se tržište BiH iz razloga što učesnik koncentracije privredni subjekt DPD posjeduje skladišta u Federaciji Bosne i Hercegovine i u Republici Srpskoj, što omogućuje neometano pružanje usluga na čitavoj teritoriji BiH.

U tom smislu, relevantnim tržištem predmetne koncentracije smatra se tržište pružanja kurirskih usluga, osim javnih poštanskih, na cijeloj teritoriji Bosne i Hercegovine.

## **6. Analiza relevantnog tržišta**

Izuzev privrednog subjekta GeoPost International Management & Development Holding GmbH koji posjeduje 30% udjela u privrednom subjektu DPD na tržištu u Bosni i Hercegovini nije prisutan niti jedan drugi privredni subjekt koje pripada grupi GeoPost/La Poste.

Privredni subjekt DPD ima ukupno četiri skladišta na tržištu Bosne i Hercegovine i to glavno skladište u Sarajevu te tri manja skladišta u Banja Luci, Tuzli i Mostaru. Svaki od navedenih skladišta se koristi za isporuku pošiljki u gradu u kojem se skladište nalazi te području oko njega. Skladišta u Banja Luci, Tuzli i Mostaru imaju dva puta dnevno vezu sa skladištem u Sarajevu. Sva skladišta i veze koje DPD koristi su iznajmljena od privrednog subjekta Lagermax.

Tržišni udjeli učesnika koncentracije privrednog subjekta DPD i glavnih konkurenata učesnika koncentracije, bazirani na broju isporučenih pošiljki, na tržištu Bosne i Hercegovine za 2007. godinu prikazani su u Tabeli 2.

**Tabela 2.**

<b>Redni broj</b>	<b>Naziv privrednog subjekta</b>	<b>Tržišni udjeli (%)</b>
1.	DHL d.o.o.	22,00
2.	Rhea Expres – FedEx d.o.o.	21,00
3.	In time d.o.o. – TNT Global Express	20,00
4.	24 VIP d.o.o	19,00
<b>5.</b>	<b>DPD</b>	<b>3,00</b>
	Ostali	15,00
	<b>UKUPNO</b>	<b>100,00</b>

Prema podacima Podnosioca prijave tržišni udio privrednog subjekta DPD na relevantnom tržištu u 2007. godini iznosio je približno 3%. Nakon provođenja predmetne koncentracije, a na osnovu činjenice da je privredni subjekt Grupa GeoPost na relevantnom tržištu do sada bio prisutan samo putem 30% udjela u privrednom subjektu DPD, a predmetnom koncentracijom kupuje preostalih 70% udjela, tržišni udio učesnika koncentracije na području Bosne i Hercegovine će ostati nepromjenjeni.

#### **7. Ocjena predmetne koncentracije**

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona u postupku donošenja predmetnog Rješenja ocijenilo da provođenje predmetne koncentracije neće narušiti postojeću tržišnu konkurenciju, s obzirom da Grupa GeoPost putem privrednog subjekta GeoPost S.A. vrši potpunu kontrolu privrednog subjekta DPD i na taj način se ne povećava tržišni udio privrednog subjekta DPD na tržištu pružanja kurirskih usluga (osim javnih poštanskih) i brze isporuke pošiljki u Bosni i Hercegovini.

Konkurencijsko vijeće je utvrdilo da se predmetnom koncentracijom privrednih subjekata ne stvara i ne jača dominantan položaj na relevantnom tržištu pružanja kurirskih usluga (osim javnih poštanskih) i brze isporuke pošiljki u Bosni i Hercegovini te je odlučilo kao u dispozitivu ovog Rješenja.

#### **8. Administrativna taksa**

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

#### **9. Pouka o pravnom lijeku**

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

**Predsjednik**

**Ibrica Lakišić**